

梅子亭四六標準十

共五冊元

合十

庫 文 閣 内			
函	架	冊	號
		一 九	二 七 四 二
		特 四 十 二	類
			漢 書

内 閣 文 庫			
番 號	漢	11742	
冊 數		19 (13)	
函 號	圖	3	5



国立公文書館
National Archives of Japan

原本の文字など不明瞭な個所があります。

梅亭先生四六標準卷之二

憲使

新宮城書藏

賀李知府除潼川提刑

錫

舟檢起家繡衣問俗故國非喬木之謂世選爾勞
 奕葉茂猗蘭之光汝陳時臬星言雙節風聳列城
 恭惟某官器博而通材弘以毅卓犖坐空於萬馬
 笑談立解於千牛謂之檇杙謂之春秋素高家學
 有若伊陟有若臣苞宜襲世官與其勞四國之蕃
 宣不若奉六條而廉察公私之積可痛有賴阜通
 輕重諸罰有權尤資閱實昔者鯉趨而獨立今茲

文淵閣

三
五
虎拜以揚休載馳載驅共說西平之有子善繼善
述更觀東府之象賢某濫守憇棠獲依蔭擬作鹹
作辛作苦幾不容一日之安惟內惟貨惟來詎敢
逭二天之按其爲歸倚罔旣編摩

賀潼川李提刑除夔路提刑

錫

自天出綍易地褰帷家人有嚴君焉舊膺此選皇
華遣使且也今世其官雖曰因避親之嫌亦見善
繼人之志夔藩幸甚梓部駭然恭惟某官器重以
周材弘且毅與人忠而執事敬見善明而用心剛
四國于蕃茂甘棠之蔽芾六轡如組訝苞栩之倭

遲曾未暖席之間倏有改轅之命惟四蜀之門戶
倚三峽爲咽喉昔先正保衡於此展澄清之志今
命汝大正庶乎體欽恤之心遙知叱馭而驅之會
有解印而去者忠信缺矣蓄積缺矣暫勞雙節之
馳錢穀幾何斷獄幾何佇對九宸之問某方依雲
覆忽報星移雖難留有脚之陽春然尚冀驩顏於
廣廈送我而入楚澤固猶恨遠水之遶思君而下
渝州會問訊清溪之發其爲忻懌罔旣編摩

賀新潼川王提刑

禧

奏最觀風詳刑易地天旋夔峽垂光來近於蔚藍

星入益都載驟復歌於苞栩仁聲籍甚封部驩然
恭惟某官從容以和洵美且直自爲名進士之日
蔚有古君子之風旣疇庸磊落之州合入從通明
之殿顧煩雙節往控三巴蜂腰鶴膝之飢甞復盈
膚革雀角鼠牙之滯訟洞燭肺肝古井無波陽春
有脚還濡牡轡來顧鶴林禮樂言遠而有光况接
鄉閭之近刑罰不中則無措更兼倉庾之平雖則
劬勞又復馳驅於原隰周爰咨度便當獻納於軒
墀某乘障非材奉身受察五善重拜忻聞君子之
得輿百拙一勤儻許小人之全璧其爲頌詠未易

編摩

通劉提刑

堂

丹墀賜對繡斧詳刑君遣使臣固光華於在遠獄
爲司命必明謹而不留一賢觀風萬物吐氣恭惟
某官器函方重識抱浚明曾中風月之無邊一塵
不染筆下源泉之不擇萬斛而羸頃厭承明出將
英盪以九畿施邦政天不違顏障百川回狂瀾海
爲縮足頌退須於檠戟復出駕於軺軒司長沙千
里之平惟良折獄澄洞庭九州之大何擇非人從
知察小大之情必不容上下其手周爰咨度即開

衡嶽之雲慨然澄清何愧滄浪之水所恐思賢於
宣室還當問路於脩門某起家一寒去國三暑強
顏倚席昔慚洛下之生箝尾對墻今補黔中之佐
雖云貳郤正隸六條廉不掩聾敢嘆永哉之余負
戇今成癖亦惟使者之汝容

通成都周提刑居信

門參歷井再為油幘之趨挹斗揚箕揔隸綉衣之
察欲徹畸孤之名氏例須耦儷之簡書斐然抽毫
滂若下汗伏念某學未聞道年不後人亦知富貴
之浮雲不如貧賤豈無名教之樂地何必事功直

以飢驅為此祿仕西望太白窘峽水之倒流東訪
蓬萊值海風而引去不謂詩書之元帥尚憐鄉里
之小兒表之鷄書隨以馬幣遂冒瞿唐五六月之
險來訪巫山十二峯之高揆材地以闕然託使天
而近只恭惟某官人今而心古行峻而氣平少年
公瑾之綸巾豈甘寂寂他日伯仁之金印徑可纍
纍居然盤旋州縣之間無乃培養廊廟之業勇訪
半輪之月徑登九折之塗載酒凌雲頓釋里閭之
愁嘆埋輪當路欲周原隰之咨諏何敬非刑惟明
克允歛此大惠亦既洽魚鳧之民訖其外庸即歸

接夔龍之武尚念某不遠萬里來奉六條安於小
官而不辭亦惟君子之易事昔在嚴公幙聞俱為
蜀使之知難甘原憲貧或竊效貢公之喜

通潼川丁提刑必稱

登蜀猶天撫塵蹤而自嘆仰韓如斗瞻熒次以非
遙敢裁小子之斐然敬告大夫之賢者伏念某才
踈而力腐少賤而長窮託疲芥於山林未能辟穀
繫飢愚於簪笏却媿伐檀居然四十之頭顱孰是
尺寸之竹帛頃自湘濱之樵悴誤為錦里之逢迎
半路逆遭竟勤回於俗駕三年飄忽難重入於禮

羅不謂再剖符之文翁未廢三折肱之韓子撰書
詞而具幣又委重焉苟岫幌而掩關既無及矣惟
是居攸之禕允之任却愧乏儀之群博之材治法
征謀逼人己甚臺評幙辯忤物亦多未論雞犬之
求仙誰許龜魚之託蔭恭惟某官器資疑遠材具
寬宏畫棟朱簾屈平蠻之籌策清江碧嶂蔚治郡
之功名謂宜進之清朝庶可行其素學居然龍節
戾止蠶叢禮樂言遠而有光斯言信矣刑罰不中
則無措自古謹之有如使者之賢足寄欽哉之恤
綉衣持斧寧久滯銅官之山簪筆荷囊行入侍玉

皇之案尚念其貌無所挾誰適與容燕谷自寒敢
望春風之披拂吳舡未辦尚依夏屋之帡幪

通湖南楊提刑楫

晨入太學之下曾識明師曉行湘水之春今依膚
使禮有嚴於事大書敢廢於恭先恭惟某官守道
真儒庇民正學自其驅馳於外不辭小官固知磅
礴於中而可大受由于子男之百里游賓客於諸侯
廩給百司簿正九扈人皆疑其婉晚公何有於鄙
夷園橋億萬人甫知矜式起家二千石忽有薦揚
上憐皖伯之邦久缺桐君之政徒得君重無俾民

憂一札細書朝聞命而夕引道三年成聚今有襜
而昔無襦孰期清絕之鄉又缺皇華之使爰將隆
指出揔祥刑德星臨翼軫之間楚氛已靖仙槎來
雲漢之表衡嶽頓開遙知登車之慨然必有解印
而去者周爰咨度胡不均弘某副墨謏聞勾朱末
厲譬諸川澤之下獨何蕃歟不知鄙酈之前有賈
生否適是褰帷之始欣然祭竈之榮簿領中有是
人耶非敢望也夫子嘗為委吏矣能勿誨乎

代回叢路李憲至

奏最涪江按刑巫峽于蕃而歷四國所去見思察

剡而奉六條其有所試恭惟某官分輝井絡擅秀
岷峨名父子之天資瓊璫之器難弟兄之家學金
玉其相環轍久之褰帷晚矣惟良折獄何擇非人
送以禮樂而有光既深簡在編之詩書而無媿願
益周爰某跋遠莫前賀成已後三巴疏鑿雖莫瞻
繡斧之持六轡馳驅猶願謹衣篝之護

代回浙東譙提刑令憲

畫戟奏功繡衣疏寵專城作牧既優撫字之材一
道觀風更展澄清之志有嚴星駕增重日畿恭惟
某官蓄德齋深裊身肅括郎潛甚久不矯世以爲

中卿列彌高忽抗章而請外寄隆名於壁府歛大
惠於金華民欲借君於一年公已報政於五月進
之甸服寄以獄平遠有光華况近長安之日周爰
咨度已接蓬萊之雲某甚慶得輿未遑前牘儻無
雀角可使園扉之空似是馬曹亦竊廣厦之比

代回陳提刑

守藩弗績扁舟欲問於吳江改組有嚴輿轎俾踰
於閔嶺方露章而請免倏雲翰之寵貽愧非所蒙
願竊有復恭惟某官抱材膚碩蓄學崇茲右城左
平獻納盍司於清切上原下隰咨諏久屈於皇華

既潛消佩劍之風又密移珥筆之俗日月之貴名
方起乾坤之新渥必蕃諒九吾味之同皆借君波
之及某采入其阻北足以行共飲玻璃之江已有
倚兼之幸或入鳴珂之里尚希拔薤之規

代回提刑樂郎中

繡衣平糴久勤周道之馳驅丹筆祥刑更奉漢條
之寬大民非改聚官不易方雖四海之望未厭饕然
重湖之幸何厚恭惟某官器資凝遠德履直方摩蜀
道之青天豺虎莫投其距歌郢中之白雪犬羊難
肆其腥名大震於京師材合居於給諫惟是山海

之征推難損一雞欲其財貨之懋遷是資四牡遂
煩英節來按薰湘皇皇原隰之華民無遺便暴暴
丘山之積居有積倉公若違之他邦民必爭於境
上惟良折獄何擇非人既無得而易堯信莫如於
借寇衡雲改觀頓令山嶽之自搖湘水澄波便覺
江河之易避第虞詔紫不俟突黔某辱託比肩每
蒙合志勞來還定安集欲慰疲甿同寅協恭和衷
正資益友所慙尺牘有缺朋箋魚相忘於江湖諒
不責腹中之素鳳又繼之日夜尚同歌肘後之騷

代回江東提刑譙寶文令憲

寶廬寓直玉節按刑江淮草木之威名亶孚有衆
河洛圖書之經緯爰寵此行恭惟某官奧闕刺天
脩名拔地曾吞雲夢何小者之足言舟近蓬萊又
悠然而引去萬牛莫挽四牡載馳禮樂有光公不
負澄清之志哀矜勿喜吏何敢輕重其心有功見
知不遠伊邇某民唐索寞歸夢飛騰望南浦之朝
雲未能捲雨懷江東之暮日正阻論文

代回福建詹提刑

徽之

疏恩中禁持憲外臺襄帷風動於列城洗印日新
於衆聽湖山自得原隰有光恭惟某官早抱通材

徧儀華貫游刃有餘矣經肯綮之未嘗善刀而
之得躊躇之滿志屬時更化加意審刑徑疇淑問
之賢徃任皇華之寄維閩七聚不勝鱗介之勞奉
漢六條寧止狐狸之間必有澄清之志乃無愁恨
之民其審克之行且召矣某未遑燕賀先辱魚書
君乘使者車固可想雲煙之風采詔詣行在所或
少慰塵土之心期

代回湖南胡提刑

淵

還節荆襄按刑湘楚父老迎嘆見百年之故家叔
姪交承後一門之盛事賢勞何憚聖眷方深恭惟

某官擇乎中庸好是正直一經教子諂機寧觸於
屏風萬里隨翁直氣早鏘於門限忠無不報孝可
以移何周道之驅馳忘漢闥之補拾天高蜀道甫
休捫歷之嗟地褊長沙又作回旋之舞蓋今褰帷
之所自昔稅駕其間嶺北長蛇無復元城之迎侍
遼東孤鶴足榮華表之來歸某視螺川爲近隣恍
蕞門之遠別殘燈翳復吐寧有可借之光可人期
不來徒抱相違之恨滿期召壘猶可盍簪

代回江西李提刑

珏

予環將漕持斧按刑一道三司公殆踐揚之徧兼

旬並命上應簡注之深前賀方馳後緘狎至恭惟
某官鎮浮雅量撥劇長材左馮翊右扶風居多善
政朝天津夕西極未究遠猷當戎狄講解之餘有
溪洞猖披之醜見大夫無可使者明天子選而用
之知效一官笑他人之劫劫身兼數器覺餘地之
恢恢民爲上所不爲本原安在我徃寇亦能徃保
障奚先願繼周使臣之光華豈徒漢刺史之風采
某見賢忍渴得報忘飢不解世俗書謾瓊瑤之效
報實爲天下賀願金玉之盡珍

代回湖南胡憲

澥

老形已具父自分於投簪成命莫回猶罔功而曳
履燁然下問厚甚高情恭惟某官政爲吏師行有
家法皇華原隰之上又職咨諏清切雨露之邊合
班獻納顧令衰白亦復佩蒼得非隣壁之光密借
滎河之潤某負二宜去已三上章行或使之即返
屠羊之肆願有復也遙瞻回鴈之峯

代回成都林憲

繫已

畫戟疇庸繡衣疏寵田里之無愁恨歷試茂哉原
隰之有光華載驅榮甚恭惟某官人門具美天分
仍高我奉時流窘邊幅者多矣公抱國器願縹緲籍
以須之又於典州方此將指川合東西而瞻使豈
不足歟王置左右而輔台恐未免耳既均牲饗益
煥龍光某年以衰侵心爲形役已屢章而告老兆
足以行望三節之鼎來每懷靡及

代回江東葉憲

贊

翫麟雲司將謀退而飲山綠便蕃天寵使無功而
佩水蒼徒嘖人言誰侑予美恭惟某官好是正直
多所平反江以東之瘡痍各安饘粥斗維北之喉
舌難挹酒漿猶贈以言欲革其老然持總衆職而
相望恐難備百工之所爲某鳩僇非長狐疑已決

薦尚書不煩以政終非孔戣之宜白丞相去歸其鄉當希踈廣之老

代回江西李憲

五

制五刑以即天已慙占筆居四民而時地猥使代庖諒皆皇華之光密有蔽芾之蔭恭惟某官徧持三節游歷諸司方赤子之弄兵金堅曼熾賴繡衣之持斧風動草披仁遠及於一壘官躡升於八座某水焉得北日已薄西總余轡於扶桑安知飭化集王事於苞栩願見勞還

代回廣西郭提刑

斌

隨而薦栢酒遠莫致之得書而已麥秋報之何以恭惟某官馳心拱北將指宅南漢節梅花已弄青黃之實周原苞栩既成蒼翠之陰諒惟平秩之功如在始和之吉某雲司玩歲水部媮閑三月不違仁勞飛鴻之遠到五嶺皆炎熱願秣馬以遄歸

代回利路鮮于提刑

申之

虎符遲次龍節載驅禮樂遠而光華遐心何有師旅因之飢饉敏手是資恭惟某官籍甚人門燁然地望吏民相告方懷季子之章郡縣未澄宜攬孟博之轡劔閣今爲平地鮮于世號福星公有埋輪

之心民何懸金之慮功德如是祥祉如是其善持
之刑獄幾何錢穀幾何行且召矣某老而浪出冗
未汰歸五雉爲工徒積汗顏之媿四牡勞使願收
直指之功

代回江西陳提刑

天宜

自天申命易地詳刑南海之陬旣濡無復跼爲之
困西江之水方涸更爲活鮒之謀恭惟某官奧學
名家通材資世恢乎餘刃孰嬰紫電之鋒飛不盡
翰斜取青雲之勢頃分半竹惠滿三楓尋專刺舉
之六條迄用澄清於五管惟是畫冠之化未孚珥
珥筆之民欲銷赤子之弄兵必假繡衣之持斧周
爰咨度行將勞星駕之還遠有光華何況接日畿
之近某濫茲聯事幸甚依仁所望使者之車疾驅
沃轡庶假忠焉之誨叶濟疲甿

代回廣東潘提刑

涓

分符奏最持節祥刑田里之無嘆愁選諸所表原
隰之周咨度遠乃有光恭惟某官器宇浚明風猷
膚碩頊儀六館實倡諸儒玉石一區時方負隴西
之媿淄澠異味何至空冀北之群迄著顯庸蔚爲
循吏一麾出守方幸同寅六轡載馳復聞後甲片

言可折必能體欽恤之心五嶺皆炎正足展澄清
之志星言夙駕天不違顏某十國爲連再鼓愈淡
落霞孤鶩不能奪萼菜之思尺素雙魚願無廢梅
花之寄

代回江東葉憲贊

斜日投閑冒誤恩而入侍朶雲借潤儷好語以相
先有味其言不知所報恭惟某官恢然抱負久矣
踐敷榮分刺史之符勇樸郎官之被甫陞華於卿
月又趣駕於使星斂弄明珠自是驚人之質追隨
瑣闥會歸密地之班某起家一寒去國十暑頭顱
如此難渡西嶮之光陰膂力旣愆又踏東華之塵
土會且歸矣焉用文之

代回曹提刑叔遠

顯奉郡庸肅將使拍凝香畫戟政成數月之間直
拍繡衣象應一星之入用賢如此載路驩然恭惟
某官天韻崇竑風猷峻潔三年博士誰韓愈之見
治六館諸生留陽城而不果徘徊南浦檢校東屯
却念枳城實產伊川之易因尋涪水欲昌山谷之
詩孔席未溫曹裝又趣刑罰不中則無措自昔欽
哉禮樂言遠而有光是在使者佇從四牡歸侍六

飛某方襞賀緘已蒙謝牘我留綿谷正方深通漢
之防君把繡衣未可動思吳之興

代回新葭路李提刑

至

疑畫戟之香久分漢竹持繡衣之斧式憇甘棠燕
賀厦之未能鴈寄書而何速恭惟某官氣鐘井絡
秀出岷峨真難兄之弟難弟之兄信名父之子名
子之父人生五馬貴四出守而無嫌權門九牛毛
屢掉頭而不顧乃今直指猶是斜飛持衡秉鈞此
言何為至我明刑種德所有更以贈君某日既薄
山雲猶出岫惠文柱後殆非佚老之謀神武門中

行進乞身之請

代回方提刑

信孺

已下代衛參作

觀風嶺外公遠有於光華易地江湄我但慙於玩
惕鼎來下問益仞高情恭惟某官學與古稽美全
世濟江濤如此誰知戮力於神州人物眇然士頗
傾心於執事久於直指無乃斜飛然小大之獄既
得其情則澄清之志亦足以展風雲之會朝夕以
須某分閫何功投林是幸叔夜不便於書疏遂緩
報章莊周無索其形骸尚祈終惠

代回方提刑

信孺

報政九疑觀風五嶺萬物吐氣正須結輩之賢六
轡周咨何慮越人之瘡恭惟某官風猷強濟業履
俊明學禮之有異聞蚤駿萬夫之望誦詩而能專
對卒鳩二國之民九重念功再命作牧與其田里
之無嘆息賀其見鳳之鳴何如原隰之有光華惠
尔跼焉之外星言雙節山鎮百城刑獄幾何錢穀
幾何不嫌纍印功德如是祥祉如是佇即予環某
方欲修辭遽勤委重雙魚尺素何言衛公綠竹之
詩兩驂四黃請繼方叔葱珩之詠

回葭路李提刑

鏐

二年和義之郡粗護憇棠再命通德之邦獲依仙
李不謂我入而公出真成室邇而人遐辱寄朶雲
如對落月恭惟某官負材鯁亮蓄德鴻深雪檜霜
松凜凜祖風之似公槐柳棘英英家學之傳四奏
郡庸兩將使指巖巖漢沔帳下之甲多奔往往巴
渝舟中之指可掬去孔伋君誰與守見王導吾復
何憂共歌四牡之有功行趣八鸞之入覲某獲通
侯譜且託交盟勿勞乎勿誨乎尚希忠告同姓也
同業也宜不遐遺

梅亭先生四六標準卷之二十五

梅亭先生四六標準卷之二十六

倉使

通王提舉

與權

抗章引外揭節司平正士去朝四海之疑未釋望
郎問俗三湘之幸則多况以部刺史之天來臨舊
令尹之地民信之矣帝念在茲恭惟某官天韻崇
絃風猷膚碩學問廣大日光玉潔而蛟翔志氣清
明燭照數計而龜卜早提邑最入踐朝行徧儀清
選而人訝其遲立登要路而公不之領古之君子
寧可祿歎而氣豐今之謀人渠恤身進而德退拂



衣勇其攬轡慨然載歌小雅之皇華復領大招之
清絕我聞在昔三異具見於一同民到于今五善
固忻於重拜所虞駟召靡俟馬回某去國三年起
家貳郡瞻霄漢之佳士昔蒙或輓以或推逢瀟湘
之故人今乃受容而受察偶甫至丞哉之璧末由
望使者之車文儒申申既喜迎柳公之不遠武岡
矯矯亦幾見王導而無憂

通湖南樂提舉章

人一天而我二未遑樂霧之披戒七日而齊三將
展衡雲之拜持不腆之上輅曠莫達乎中涓削續

斐然負芒悚甚恭惟某官器資顯允德履碩膺
鄉之呼吸智謀雲仍固在正子之充實善信風烈
猶存魏科摘髭要路策足落筆坐奔於萬馬善刁
立解於千牛縣庸蔚乎浮湘郡最卓於守郢不但
別盤根之利器要已知勁草於疾風盍歸清切之
班朝夕獻納勉副皇華之遣原隰馳驅甫湘水之
曉行遄蔡城之夜縛酈醪有酒洞庭無波六轡既
均復戍清絕之地一節以走恐登碧落之天某不
肖至愚無聞甚陋二科鹿鹿遂謀三金以養親千
里魚魚誰以四方而供簿然專令朱出而墨入决

不敢黃放而白催有先達者爲之前此六或遂居
下位不獲於上茲道難行受察去初願忠敢隱移
慈竹而栽率土定未忘故里之情賦梅花而獻繡
衣敢妄冀聞人之目

通新江西提舉兼知撫州徐監丞

璟

榮驅龍節兼縮魚符內府轉丞方表循良之最外
臺選使更疇牧御之庸一道驩然六條秩若恭惟
某官器資廣敏業履淑均無終義理之文夙高朱
賈有功平反之德遠邁于張峻名曹之遙知餘
風之挺挺君山出牧屹隆維屏之藩汝水竊鄰已

沐餘波之潤帝念西江之涸民多南畝之離肆咨
六轡之良并任双旌之重安其田里而無恨有蔽
芾之甘棠送以礼樂而有光寧透遲於苞栩諒耻
納溝之失所必已摭轡而慨然式遄其歸不諫亦
入其淹回蜀道企想滕仁畏此簡書之流馬木牛
之智芥然疲役知奔蜂蠶蠋之難何由回北斗之
槎尚冀下南州之榻其爲頌倭罔旣鋪茶

代回胡提奉

案

訢合守符載馳使節田里之無愁恨已茂民庸原
隰之有光華宜膺君選恭惟某官器資疑遠德履

端深迎寒露置玉壺撓而不濁懷連城佩寶璐即
之也溫有華左轡詳試右翊斂嚴瀨釣竿之手將
賦歸來適武夷粟粒之牙猶煩料理龍光甚渥牡
轡如濡君乘使者車民知免矣詔詣行在所予日
望之方欲通咫尺之書乃先勤四六之惠某老未
得謝命作納言不善斷而汗顏稍麾即去望持斧
之直指更勉其驅

代回淮東齊倉劄

訢合守符肅將使指田里之無愁恨厥績茂焉礼
樂之有光也此行寵矣恭惟某官人門具美風調

不羣溫恭維德之基於文無害平易近民之政所
去見思眷是榆邊鬱然棠蔭茲自天而出綽不易
地而褰帷淮水湯湯式展澄清之志周原膺膺行
觀勞來之功某縻迹於朝莫面以賀五雉之爲工
正久已懷歸四牡之勞使臣別遲贊喜

代回湖南楊倉九鼎

顯陞簿正改賁使華國方貪賢使服班行之上民
尤望賜故資原隄之驅畫繡分光宵衣寬碩恭惟
某官性資寬栗材具碩庸觀其不辭州縣之勞固
知必爲廊廟之器兩著扞城之績去則見思一罹

枕塊之悲毅然執禮既畢祥琴之御爰膺戎器之
除適是重湖年饑而用不足加之諸洞地大而孽
易牙欲其澄清知所斂散非輟寬閔通敏之士誰
課還定安集之功四牡載馳万物吐氣突不黔席
不煖了無偷安避事之情居有倉行有糧會見節
用愛人之孝某賀我選厥逢人說斯暮見吳山有
老大徒傷悲之感曉行湘水願功名留久遠之看

代回浙東孟提舉

植

爾將星駕分察日畿遠而光華况去天之尺五近
在且夕佇擊水之三千曾旅進之末由何謙撝之

先辱恭惟某官器資凝重德宇浚明方公少年嘗
栖棘於獨秀之下維時老子偶泛蓮於鬱孤之傍
屢獲過從不勝傾倒淒其三紀存者幾人細思一
夢之回何翅千帆之過天子有詔選公卿於西漢
之循太守謂誰疑姓名必東家之故顧取斜飛之
勢又爲直指之行登蓬萊宮問百萬蒼生之辛苦
探會稽穴添一部史記之雄深舉頭即在於長安
濯足會登於雲漢某鷄豚共杜虎鼠同宮方欲寫
贊喜之情乃先沐過情之謝承明之廬勞侍從之
事無以公歸邦家之光非閭里之榮豈惟我賀

代回江西王提舉

顧問

簪筆何功蒙誤恩之起廢函牋為惠感妙語之嘯
枯有味其言不知所賀恭惟某官王之膺使古之
謀人陳慨登車覺范滂之不遠勤渠下榻延徐穉
以來前故當駕彼四牡之勤不廢遺我雙魚之寵
某老將及耄生也有涯雖則荷囊還本來之面目
其如蓬鬢當自揣於頭顱曷月還歸定相從於杖
屨因風占謝愧莫報於瓊琚

代回湖南葉提舉

宗魯

起自家林甫將庾節民以財為本當加培埴之功
君乘使者車必有阜通之政得人如此通國驩然
恭惟某官風調不群天材甚茂郎潛既久忽為襍
被之謀邊隙方開亟進徙薪之計身謀雖左物望
益高茲膺禮樂之光華復仕貨財之平準政恐公
車之暮召不容湘水之曉行某嘗具一箋未敢多
賀駕彼四牡諒有功而見知雖則七襄愧成章之
匪報

代回孟提舉

植

生日

庭帝門弧方切蓂莪之感函牋亭餽仰勤桑梓之
情卻之不恭用是下拜恭惟某官高誼絕俗厚意

噓枯記孟陬之庚寅撫其遲暮憐絳人之甲子混
在泥塗華以緹緘加之飲饌某丁年託契亥字過
期鵝鴨之惱比鄰甚華登俎雞豚之同保社敢不
舉觴

代回章提舉

良肱

郡符訢合吏節光華昔湘南之一州斂此大惠今
江西之列郡汔可小康演而申之自此升矣恭惟
某官器資凝遠學行淵深領著讎中豈固薄蓬萊
之島抗章請外必欲開祝融之雲人言衡山千里
而遙孰知周公暮年而變茲從畫戟易舁繡衣載
馳載驅民已安於四境受容受察吏知服於六條
將由庸使之功又趣回君之詔燕人爲函粵人爲
罇奏技闕然伯氏吹璣仲氏吹篪均茵幸甚某自
聞除目尤切歡顏託諸侯以寓公自今以始受一
屢於仁政曷月于歸

代回文思趙提舉

希倉

疇庸百里進轄五工禮儀知皇帝之尊所闕甚重
臺閣須子弟之習未占已孚恭惟某官禮樂宗英
典刑家法兩試一同之地並騰三異之聲所去見
思願留借寇後來居上無以易堯夏氏上匠虞氏

上陶小煩鳩僭周公拜前魯公拜後會即象賢某
天幸同曹阜勤委贄名父子之塵塊俯仰為僚老
詩書之斷輪始終知免

代回孟提舉

植

憲曹賚治自揆罔功起部虛負遽叨攝長冒國恩
而有醜託鄰比以知歸恭惟某官密邇王畿久將
使蕩有功則說行當勞四牡之來位事惟能必進
苞六飛之御何旁觀之巧匠猶不廢於拙工特枉
雙魚見華五雉某瀆三不告負四宜休某水某丘
乃童子所釣遊也彼鋸彼斧惟梓人之進退焉

代回浙東王倉

遇

右翊合符左畿易節田里之無愁恨畫地共談原
隰之有光華去天一握恭惟某官學為儒倡政号
吏師出守晉陵適楚氛之甚惡獨明召教救周民
於子遺茲由畫戟之香進席綉衣之寵公方念越
人之睿加戚于心上將思王某之文最宜為誥某
比方謁入復辱書來四牡之勞使臣行且召矣五
雉之為工正猶幸見之

代回廣東孟提舉

植

避直郎闡服勤使節番陽之召來朝何錫予之嶺

嶠于行言遠而光華也恭惟某官受才膚敏賦政
中和不俟駕固將朝陳前甚敬將入門奔而殿敢
後則非駘駘馬之嘽嘽妥飛鳶之跼跼梅花雪片
洗空五嶺之炎茶焙鹽帆贍足九年之食使乎不
辱王所謂何其有幸卜鄰謂當聯事北山曠瞻已
移猿鶴之文東野回頭猶有駉蛩之願

代回湖北趙提舉

師石

虎符訢合牡轡光華卧護重湖材素雄於辨治身
兼數印權益重於按臨恭惟某官德秉枕恂識全
膚敏一路大計惟錢穀幾何刑獄幾何連年多虞
蓋蓄積缺矣忠信缺矣繡斧茲煩於直指綵衣尤
與於平反載馳載驅想星言之夙駕是撫是袞將
天道之好還某闕然儻功偶此攝長送之以札樂
愧賀幅之已稽是以有衮衣願德音之是懋

代回淮東陳倉

孔碩

抗辭請外將拍臨送明啓刑書末覺丞哉之負式
遏寇虐正觀使者之功恭惟某官表嚴而裏寬人
今而學古孔懷同氣蟬孰歎於有綾折獄片言雀
難欺於無角適淮民之飢饉勤周道之倭遲側聞
褰帷良多負襁粟塞其庾斯成末乃取闢之勲印

弄於朝行有無以易堯之命某濫司飭化莫贊光
華遺我雙魚豈止加餐之字駕彼四駱請歌靡盬
之詩

代回江西章提舉良肱

五雉工正之聯承人之乏四牡使臣之重博我以
文得非所蒙願切有復恭惟某官內外揚歷表裏
融明開南嶽之雲厥功已茂激西江之水所惠滋
多蘇民氣於崇朝斧盜吮芳未晚皇華原隰之上
願益咨諏清切雨露之途會觀獻納某強顏曳履
決意投簪觀風而問高年想憐其出畫地而數佳
政亦足以歸

代回浙西林提舉拱辰

簪筆何功蒙誤恩之起廢函牋爲惠感妙語之嘘
枯或承之羞不知所賀恭惟某官高誼絕俗厚德
鎮浮宜頡頏於飛霞猶簸弄於明月駕彼四牡名
大震于京師遺我雙魚光自生於庭戶某拜命之
辱有味其言咫尺不違顏雖少華於末路八十猶
行脚諒見笑於大方

代回淮東劉提舉庚

斜日投閑冒誤恩而入侍朶雲借潤僂好語以相

先自惟闕然何以得此恭惟某官早飛雋望寢踐
夷塗忽持漢節之光華出問淮人之飢饉民爲國
之本不應壹付之烏鳶君乘使者車乃可再安於
鴻鴈行且召矣願少需之某生也有涯身其餘幾
意行迷路又涉赤墀之塗具尺回舡終尋黃石之
約

代回淮東趙提舉

希道

甸侯底績庾節遄驅十二政之聚民可觀近效六
百石之察郡益究遠圖迓面得賢上心倚重恭惟
某官稟資信厚毓德直溫頃結綬於王畿即分符
於輔郡適時艱食極力救荒能活數十萬人之飢
何必二十四考之政有華出綽亟命褰帷財貨本
末源流諒皆素習勞來還定安集自有成規六轡
旣均二節以走某欽聞視篆未果襍牋遺我雙魚
良感從遠方之惠駕彼四牡何幸勞使臣之來

代回湖北曹提舉

彥約

短衣疋馬又塵紫橐之班長跪雙魚如見繡衣之
面雖無以報敢誦所聞恭惟某官學本遺經用周
當卅一種陶潛之秫再依王儉之蓮扞索虜於淮
濱屹長城於漢水恢然游刃經肯綮之未嘗快哉

此風搏扶搖而在下屬重湖之瘡疖煩一節之咨
誦因而訪桃源之桃不妨假館恐未熟摘洲之橘
已見趨裝某久於離群茲焉還綴老夫耄矣更數
旬金馬之門我公歸兮或一笑銅駝之陌

代回趙提舉

汝謹

代衛參

分閩罔功願歸吳下改轅有命俾牧閩中業已控
辭期於得請欲謝吹噓之送已成臯緩之慚恭惟
某官屈漢宗英持周使蕩江湖表裏勤四牡之載
驅山嶽動動搖覺千牛之立解飢者欲令其得食慨
然已見於登車諒必由洪都新府而來猶可陪異
州故人之飲行止非人能也得無恋恋之情解后
適我願兮宜有諄諄之誨第恐一節之走能回六
轡之馳某正爾思葺文蒙分竹采入其阻足觀海
上之禽魚不已于行只負山中之猿鶴

回王提舉

遇

代月湖

右翊合符左畿步節田里之無愁嘆畫地共談原
隍之有光華去天一握恭惟某官學為儒倡政作
吏師出守晉陵適楚氛之甚惡獨明召教救周民
於予遺茲由畫戟之香進席繡衣之寵公方念越
人之瘠加戚于心上將思王某之文最宜為誥某

比方謁入復辱書來四牡之勞使臣行且召矣五
雉之爲工正猶幸見之

回尤提舉禁

去國奉祠久抱伐檀之媿起家進職忽叨分竹之
榮曾異謝之未皇何謙撝之甚寵恭惟某官見聞
殫洽議論崇欲尚書之履有声典刑是似部使之
斧直指風采凜然皇華寧久於咨詢清切即觀於
獻納其同爲吳客共落楚鄉德必有鄰僭輔車而
增重服之無數藏簡牘以爲榮

宗正

代回西外趙知宗不應

小宰立班愧星辰之曳履大宗維翰貽月露之連
編雖過乎情良感此意恭惟某官枕函有守信厚
不浮天揖同姓之聯肅然糾合尽日宣三德之
敬莫不浚明雖去爲善之居家尤樂推賢而報國
有華新渥猥及陳人某司臬亡庸共工甚忝虎拜
稽首願觀蕃錫之榮龍作納言已懼曠官之辱

代回西外趙知宗不應

疏詔東平展親西外王曰叔父立愛始于家邦汝

作秩宗受祉施于孫子棣華韡々瓜瓞綿綿恭惟
某官大雅不群為善最樂箴規磨琢蹈衛武之流
風忠義輪囷絜劉向之封事庸專糾合之任助成
睦族之仁周之宗盟誰若滕侯之長唐之宰相豈
遺德裕之賢某側聽渙揚未遑旅賀召伯分治諒
信如麟趾之詩長卿倦游愧莫續兔園之賦

海亭先生四六標準卷之二十六



